

**BIOGRAFI RINGKAS/ A SHORT BIOGRAPHY OF
TOK GURU DATO' BENTARA SETIA
DATO' HJ. NIK ABDUL AZIZ BIN
NIK MAT**

Penaung

YAB Dato' Bentara Kanan Ustaz Dato' Ahmad Yakob

Panel Penyusun

Dato' Dr. Johari Mat

Nurliyana Ahmed

Ahmad Fathi Yusoff

Panel Penyemak

Tuan Guru Nik Razi Nik Mat, (JAWATAN)

Prof. Madya Dr. Nik Yusri Musa, Profesor Madya, UMK

Penterjemah

Nurul Iman Ahmad Bukhari

BIOGRAFI RINGKAS TOK GURU DATO' BENTARA SETIA DATO' HJ. NIK ABDUL AZIZ BIN NIK MAT

Tok Guru gelar rakyat kepadanya, manakala Dato' Bentara Setia diampuni perkenan oleh Tuanku Sultan Muhammad V, sedang nama tubuhnya Nik Abdul Aziz bin Nik Mat.

KETURUNAN

Tok Guru dilahirkan pada tahun 1350H/1931M di Kampung Pulau Melaka, Kota Bharu Kelantan, anak kepada pasangan Nik Mat @ Raja Muhammad bin Raja Banjar dan Siti Aminah bt Abdul Majid; mewarisi jalur keturunan kerabat Diraja Jembal yang pernah memerintah Kelantan antara tahun 1048H/1638M hingga 1132H/1720M.

Tok Guru merupakan anak kedua daripada 18 orang adik beradik dalam keluarga besar Nik Mat @ Raja Muhammad bin Raja Banjar yang beristeri empat. Ibunya, Siti Aminah binti Abdul Majid merupakan isteri pertama. Bersama isteri pertama, Nik Mat memperoleh lima orang anak mata iaitu: (1) Nik Zainab, (2) Nik Abdul Aziz (3) Nik Khadijah (4) Nik Azizah dan (5) Nik Razi, manakala bersama isteri kedua ialah Kalthum binti Awang, Nik Mat memperoleh seorang anak iaitu Nik Hussin, seterusnya bersama isteri ketiga Tengku Mariyam binti Tengku Mat, Nik Mat memperoleh tujuh orang anak iaitu: (1) Nik Abdullah, (2) Nik Wajis, (3) Nik Aishah, (4) Nik Din (5) Nik Aminah, (6) Nik Razin dan (7) Nik Nasim bersama isteri keempat Raja Tijah binti Raja Mamat, Nik Mat memperoleh lima orang anak iaitu: (1) Nik Zubaidah, (2) Nik Mariam, (3) Nik Daud, (4) Nik Rosnah dan (5) Nik Muhammad Ajun.

Ayah Tok Guru, Nik Mat @ Raja Muhammad bin Raja Banjar yang dilahirkan pada 1905 dikenali masyarakat dengan nama panggilan Tok Guru Nik Mat Alim kerana kealiman dan pengamalan agama dalam kehidupan. Tok Guru Nik Mat Alim pernah berguru mempelajari ilmu tafsir Al-Quran, hadis, fiqh, tasauf, tajwid dan mantik dengan beberapa orang ulamak terkenal Kelantan antaranya Hj. Omar Mentuan, Tok Kenali, Tuan Guru Hj. Wan Musa, Tok Khurasan dan Sidi Azahari. Beliau pernah membawa anak-anak termasuk Tok Guru bersama-sama untuk menuntut ilmu dengan Tok Khurasan. Beliau juga

mengajar sendiri Tok Guru asas-asas ilmu agama dan bahasa Arab sebelum menghantar Tok Guru menuntut ilmu dengan beberapa orang tuan guru lain.

PENDIDIKAN

Tok Guru pernah menerima pendidikan formal di Sekolah Kebangsaan Kedai Lalat selama tiga bulan pada tahun 1936M. Sebelum berusia sembilan tahun, Tok Guru telah dihantar oleh ayahnya untuk menuntut ilmu di Madrasah Diniyyah Ittifaqiyah, Jertih, Terengganu untuk berguru dengan Tuan Guru Hj Abas bin Hj Muhammad. Setelah beberapa ketika, Tok Guru terpaksa menanggungkan pengajian dan pulang ke rumah berikutan serangan Jepun terhadap Tanah Melayu pada 1941M. Tok Guru juga pernah belajar di Madrasah Arabiah Jamek Merbau al-Isma'ili (kini Maahad Muhammadi). Pengetua pada ketika itu ialah Hj. Ismail Pontianak, manakala antara guru-guru ialah Hj. Ahmad Mahir, Hj Nik Adib, Hj. Said Kangkong, Hj. Yaakub bin Hj Ahmad, Hj. Nik Abdul Rahman bin Hj. Nik Abdullah Khatib dan Tuan Guru Hj. Ali Pulau Pisang. Pada sama yang sama juga, beberapa ketika, Tok Guru berguru dengan Tok Khurasan di Kg. Sireh, Kota Bharu dengan mempelajari Kitab Mishkat al-Masabih. Apabila Madrasah Diniyyah Ittifaqiyah dibuka semula setelah keadaan aman pada 1947M, Tok Guru kembali meneruskan pengajian dengan berguru dengan Tok Guru Hj. Abas Hj. Muhammad dan Ustaz Abdullah Hj. Muhammad (Ustaz Lah India).

Kemudiannya pada tahun 1952M, Tok Guru berangkat ke India untuk menyambung pengajian ke Universiti Darul Ulum, Deoband, India. Tok Guru belajar dengan ulama-ulama dan pemimpin gerakan Islam India antaranya Maulana Mahmud Hassan, Maulana Sheikh Ali dan Maulana Sayyed Ahmad Husain al-Madani (Aseer Malta). Sayyed Ahmad Husain merupakan pakar hadis dan tarikat serta Presiden Jamiyyat-i- Ulama-i-Hinds.

Tok Guru kemudiannya mengambil Kursus Tafsir Al-Quran di Jami'ah Khuddamuddin, Lahore, Pakistan pada tahun 1957M selama 4 bulan. Kemudian pada tahun 1958M, Tok Guru menyambung pengajian di Universiti Al-Azhar, Mesir dengan biasiswa Mukhtar Islam. Tok Guru lulus Ijazah Sarjana Muda Pengajian Bahasa Arab dalam tempoh dua tahun dan lulus Ijazah Sarjana Perundangan Islam juga dalam tempoh dua tahun.

Antara guru-guru luar negara Tok Guru:

- i) Maulana Husain Ahmad al-Madani (Hadith dan Tarekat)
- ii) Maulana Qari Muhammad Tayyib Sheb Qasmi (Tasawwuf)
- iii) Maulana Syed Fakhru Hasan Moradabadi (Sahih Muslim dan Tafsir al-Baidhawi)
- iv) Maulana Muhammad Ibrahim Baliyawi (Sahih Tirmizi)
- v) Maulana Muhammad Naim (al-Adab al-Mufrad)
- vi) Maulana Ahmed Ali Lahori Amir Anjuman Khuddamuddin (Tafsir)

PERKAHWINAN

Setelah lebih 10 tahun di perantauan, Tok Guru akhirnya pulang ke tanah air pada awal tahun 1962. Pada tahun 1962 inilah juga, pada usia 31 tahun Tok Guru mengahwini Tuan Sabariah binti Tuan Ishak yang pada ketika itu berusia 14 tahun dan dikurniakan 10 orang cahaya mata: (1) Nik Noraini (lahir pada 1963), (2) Nik Omar (1965), (3) Nik Adli (1967), (4) Nik Abdul Rahim (1969), (5) Nik Abduh (1970), (6) Nik Adilah (1971), (7) Nik Asri (1973), (8) Nik Amani (1975), (9) Nik Amalina (1977) dan (10) Nik Asma Salsabila (1984).

KERJAYA

Dengan kepulangan Tok Guru dari luar negara, ayah beliau, Tok Guru Nik Mat Alim mengasaskan Maahad Darul Anuar dan melantik Tok Guru sebagai Mudir pertama. Tok Guru mengambil pendekatan pentadbiran yang teratur dan sistematik, manakala sumber kewangan untuk pembangunan dan pengurusan sekolah pula diperolehi hasil daripada sumbangan orang ramai. Pada masa yang sama Tok Guru juga berkhidmat sebagai guru di Madrasah Al-Tarbiah Al-Mardhiah, Panchor. Disamping itu juga Tok Guru juga menyampaikan kuliah agama di merata tempat termasuk juga di Masjid Pulau Melaka secara giliran dengan ayahnya, Tok Guru Nik Mat Alim.

Pada 1962 Tok Guru telah ditawarkan jawatan sebagai Penyelia Kelas Agama Dewasa di Jabatan Kemajuan Masyarakat (KEMAS), Kementerian Pembangunan Luar Bandar. Tok Guru Nik Mat Alim membenarkan Tok Guru dilantik dengan beberapa syarat: (1) Bebas menyampaikan kebenaran ajaran Islam, (2) Bebas menyampaikan kebenaran walaupun menyentuh pihak-pihak tertentu dan (3) Cuma dibayar elaun bukannya gaji yang hanya cukup menampung urusan pengajaran sahaja. Kelas Agama Dewasa KEMAS ini dilakukan pada waktu malam sahaja. Setelah dua tahun melaksanakan tugas di serata

daerah Kota Bharu, Tok Guru mengundurkan diri pada 1964 ekoran kebebasan berceramah ditarik balik kerana Tok Guru menyentuh soal pembentukan negara Islam dan kewajipan untuk menegakkan hukum Allah. Kemudian, Tok Guru ditawarkan menjadi guru di Maahad Muhammadi, Kota Bharu iaitu sekolah agama tertua dan terbesar di Kelantan.

Tugasan sebagai guru di Maahad Muhammadi makin merancakkan lagi gerak kerja dakwah Tok Guru kerana dihubungkan oleh anak murid di seluruh Kelantan. Bermula dengan Masjid Langgar, kemudian Masjid Uda Murni, Masjid Kedai Buluh dan kemuncaknya Tok Guru berkuliah di masjid negeri, Masjid Muhammadi.

POLITIK

Penglibatan Tok Guru dalam PAS bermula tanpa dirancang apabila namanya dipilih tanpa pengetahuannya untuk menjadi calon PAS bagi pilihanraya kecil Parlimen Kelantan Hilir pada tahun 1967 ekoran kematian penyandang Haji Ahmad Abdullah Prai yang meninggal dalam kemalangan jalan raya. Tok Guru menerima pelawaan tersebut sekaligus mendaftar sebagai ahli PAS pada 20 September 1967 dengan nombor ahli 66167 dan meletakkan jawatan serta merta sebagai guru di Maahad Muhammadi, tiga hari sebelum menjadi calon PAS. Dalam pilihanraya itu, Tok Guru mengalahkan calon Parti Perikatan, Tengku Noor Asiah dengan majoriti 3,259 undi. Tok Guru mendapat 11,855 undi manakala Tengku Noor Asiah mendapat 8,596 undi.

Pada ketika itu Kelantan telah ditadbir oleh PAS sejak 1959 dengan Dato' Bentara Jasa Haji Ishak Lotfi Omar menjadi Menteri Besar pertama selepas merdeka sehingga Pilihan Raya Umum 1964 sebelum digantikan oleh Dato' Mohd Asri Haji Muda.

Rekod penyertaan Tok Guru dalam pilihanraya bagi Parlimen adalah seperti berikut:

Tahun PRU	Calon	Parti	Undi	Majoriti
1967 (21.10.67) Kelantan Hilir	Nik Abdul Aziz Nik Mat	PAS	11,855	3,259
	Tengku Noor Asiah Tengku Ahmad	PERIKATAN	8,596	
1969 (10.2.69) Kelantan Hilir	Nik Abdul Aziz Nik Mat	PAS	13,635	4,818
	Mohamed Salleh Ibrahim	PERIKATAN	8,817	
1974 (24.8.74) Pengkalan Chepa	Nik Abdul Aziz Nik Mat	BN	13,243	8,561
	Umar Ibrahim	BEBAS	4,682	
1978 (8.7.78) Pengkalan Chepa	Nik Abdul Aziz Nik Mat	PAS	11,897	1,978
	Muhammad Noor Ali	UMNO	9,919	
1982 (22.4.82) Pengkalan Chepa	Nik Abdul Aziz Nik Mat	PAS	16,759	5,342
	Hassan Harun	UMNO	11,417	
1986 (3.8.86) Bachok	Nik Abdul Aziz Nik Mat	PAS	16,347	
	Mohd Zain Abdullah	HAMIM	16,617	270

Setahun selepas menjadi ahli PAS, pada 19 April 1968 Tok Guru dipilih sebagai Ketua Dewan Ulamak PAS Pusat bagi menggantikan Tuan Guru Haji Hussein Rahimi Mat Saman yang mengundurkan diri dalam Muktamar Dewan Ulamak PAS Pusat di Perlis. Pada tahun yang sama juga Tok Guru dilantik sebagai Ahli Badan Perhubungan PAS Kelantan.

Kerjasama PAS dan UMNO pada 28 November 1972 sekaligus pembentukan Kerajaan Campuran Perikatan-PAS membolehkan Tok Guru menyandang beberapa jawatan penting kerajaan antaranya Ahli Lembaga Yayasan Dakwah Islamiah (YADIM) dan Ahli Majlis Kebangsaan Hal Ehwal Agama Islam.

Pasca Pilihanraya Umum 1974, Dato' Muhammad Nasir dilantik sebagai Menteri Besar Kelantan. Perlantikan Dato' Muhammad Nasir menimbulkan konflik dalaman PAS. PAS pada awalnya mencalonkan Hj Wan Ismail Ibrahim sebagai Menteri Besar tetapi dengan campurtangan UMNO, Dato' Muhammad Nasir dilantik sebagai Menteri Besar. Konflik ini berterusan dengan beberapa isu berlaku sehinggalah Dato' Muhammad Nasir dipecat daripada PAS pada 10 Oktober 1977. Sehubungan dengan itu sidang Dewan Undangan Negeri Kelantan meluluskan undi tidak percaya terhadap Dato' Muhammad Nasir pada 15 Oktober 1977. Keputusan ini menyebabkan penyokong Dato' Muhammad Nasir tidak puas hati sehingga berlaku demonstrasi di tengah bandar Kota Bharu pada 19 Oktober 1977 dan mencetuskan huru-hara. Perundingan untuk membentuk kerajaan baru gagal mencapai kata sepakat. Lalu pada 8 November 1977, Perdana Menteri Malaysia, Dato' Hussein Onn membentangkan Rang Undang-Undang Kuasa-Kuasa Darurat (Kelantan) 1977 dan Kelantan diisytiharkan darurat. Seluruh urusan pentadbiran Kerajaan Kelantan diuruskan oleh seorang Pengarah Kerajaan yang dibantu oleh Majlis Penasihat Negeri. Ekoran perkara ini juga PAS disingkirkan daripada Barisan Nasional pada 13 Disember 1977.

Rang Undang-Undang Kuasa-Kuasa Darurat (Kelantan) 1977 kemudiannya ditamatkan setelah 3 bulan iaitu pada 12 Februari 1978. Pada 11 Mac 1978 diadakan satu Pilihan Raya Negeri Kelantan. PAS mengalami kekalahan teruk dengan hanya memenangi dua kerusi sahaja daripada 36 kerusi. Kerjasama Barisan Nasional-BERJASA telah memerintah Kerajaan Negeri Kelantan dengan Dato' Mohamed Yaacob daripada UMNO dilantik sebagai Menteri Besar Kelantan. Kuliah Tok Guru di Masjid Muhammadi ditamatkan dan Tok Guru juga dilarang menyampaikan kuliah di mana-mana masjid di seluruh Kelantan.

Tok Guru Nik Abdul Aziz kemudiannya dilantik sebagai Pesuruhjaya PAS Kelantan pada 1 Mac 1981 setahun sebelum Pilihan Raya Umum 1982. Dalam pilihan raya yang berlaku pada 22 April 1982, PAS tewas dengan mendapat 10 kerusi Dewan Undangan Negeri. Pada pilihan raya umum 1986, Tok Guru bertanding buat kali pertama bagi kerusi DUN di DUN Semut Api disamping turut bertanding bagi kerusi Parlimen Bachok. Tok Guru memenangi kerusi DUN Semut Api tetapi tewas bagi kerusi Parlimen Bachok. Keseluruhannya PAS memenangi 10 kerusi DUN.

Rekod Tok Guru dalam pilihanraya DUN:

Tahun PRU	Calon	Parti	Undi	Majoriti
1986 (3.8.86) Semut Api	Nik Abdul Aziz Nik Mat	PAS	6,233	2,139
	Hafsah Osman	UMNO	4,093	
1990 (21.10.90) Semut Api	Nik Abdul Aziz Nik Mat	PAS	9,504	6,993
	Wan Mat	UMNO	2,511	
1995 (25.4.95) Chempaka	Nik Abdul Aziz Nik Mat	PAS	7,851	4,917
	Yusuf Isa	UMNO	2,934	
1999 (29.11.99) Chempaka	Nik Abdul Aziz Nik Mat	PAS	8,649	6,347
	Ropli Ishak	UMNO	2,302	
2004 (21.3.04) Chempaka	Nik Abdul Aziz Nik Mat	PAS	7,889	3,694
	Ruhani Mamat	UMNO	4,195	
2008 (8.3.08) Chempaka	Nik Abdul Aziz Nik Mat	PAS	9,514	4,249
	Nik Mohd Zain Omar	UMNO	5,265	
2013 (5.5.13) Chempaka	Nik Abdul Aziz Nik Mat	PAS	12,310	6,500
	Wan Razman Wan Abdul Razak	UMNO	5,810	

Tahun

20 September 1967

1968-1995

1968-1981

1981-2013

1987-1991

1991-1994

1995-2015

Jawatan dalam Parti

Mendaftar sebagai ahli Parti Islam Se-Malaysia

Ketua Dewan Ulamak PAS Pusat

Ahli Perhubungan PAS Negeri Kelantan

Pesuruhjaya PAS Negeri Kelantan

Ahli Majlis Syura Ulamak PAS

Timbalan Mursyidul Am

Mursyidul Am

Tahun

1967-1969

1969-1986

1968-1990

1986-1995

1995-2015

1990-2013

Jawatan dalam Kerajaan

Ahli Parlimen Kelantan Hilir

Ahli Parlimen Pengkalan Chepa

Ketua Pembangkang DUN Kelantan

ADUN Semut Api

ADUN Chempaka

Menteri Besar

MENTERI BESAR

Bagi menghadapi Pilihanraya Umum 1990, PAS mengadakan kerjasama politik dengan menubuhkan Angkatan Perpaduan Ummah (APU) yang dianggotai oleh PAS, Semangat 46, BERJASA dan HAMIM. PAS Kelantan dibawah kepimpinan Tok Guru selaku Pesuruhjaya memilih ‘Membangun Bersama Islam’ sebagai manifesto. Hasilnya pada Pilihanraya Umum pada 21 Oktober 1990, Angkatan Perpaduan Ummah berjaya memenangi kesemua 39 kerusi DUN dan Tok Guru telah dilantik sebagai Menteri Besar Kelantan. Majlis mengangkat sumpah sebagai Menteri Besar diadakan di Istana Negeri Kubang Kerian di hadapan Kebawah Duli Yang Maha Mulia Sultan Ismail Petra Ibni Al-Marhum Sultan Yahya Petra.

Manifesto PAS dalam Pilihanraya Umum 1990 yang bertema ‘Membangun Bersama Islam’ kemudiannya diterima dan disahkan oleh Majlis Mesyuarat Kerajaan (MMK) Negeri Kelantan sebagai rujukan dalam membina kerangka dasar bagi perancangan program dan projek pembangunan Kelantan.

Gagasan Membangun Bersama Islam ditakrifkan sebagaimana berikut:

Justeru itu maksud MBI bagi Kerajaan Negeri Kelantan ialah pelaksanaan pembangunan yang menyeluruh dan serasi dengan nilai-nilai Islam, mementingkan aspek kemanusiaan, dimantapkan dengan ketaatan kepada agama dan tidak memudaratkan sosial dan moral manusia, demi mencapai keredaan Allah.

Manakala visi gagasan Membangun Bersama Islam adalah:

Menjadikan Kelantan sebagai sebuah negeri yang terlaksananya nilai-nilai hidup Islam dan mendapat keredaan Allah.

Sementara misi gagasan Membangun Bersama Islam adalah:

Melaksanakan agenda pembangunan negeri dan ummah berdasarkan ajaran Islam yang syumul melalui pembangunan insan dan perancangan yang strategik.

Gagasan Membangun Bersama Islam ini mempunyai empat objektif sebagaimana berikut:

1. Memperbetulkan pemahaman yang menafikan dasar-dasar Islam di dalam merealisasikan program pembangunan yang menyeluruh. Sekaligus akan meletakkan program pembangunan berlandaskan syariat Islam di Kelantan seiring dengan kehendak masyarakat majmuk dan pelaksanaan pembangunan berlandaskan syariat Islam memberi manfaat kepada semua kaum dalam negara ini; dan sekaligus meyakinkan masyarakat Kelantan khususnya dan masyarakat Malaysia amnya bahawa masyarakat majmuk bukanlah menjadi batu penghalang kepada pelaksanaan syariat Islam.
2. Menggubal dan melaksanakan dasar-dasar Islam ke arah merealisasikan anggota masyarakat Kelantan sebagai khalifah yang bertaqwa, produktif, progresif dan menghayati kemajuan mengikut cara hidup Islam (dinul-Islam).
3. Menggubal dan melaksanakan dasar-dasar Islam dalam kerangka menggerak yang makruf dan mencegah yang mungkar atas keyakinan bahawa pendekatan ini memacu pembangunan negeri menuju kemenangan (falah) dan menghindari kerosakan (fasad).
4. Melaksanakan dasar pembangunan negeri bukan semata-mata atas perkiraan keuntungan berdasarkan prinsip persaingan yang tidak sihat tetapi menekankan keseimbangan di antara kemajuan di dunia dan kebahagiaan di akhirat.

Bagi memastikan objektif-objektif gagasan Membangun Bersama Islam dapat direalisasikan sebaik mungkin, pelaksanaan MBI memberi tumpuan kepada lima aspek iaitu: (1). Melaksana Syariat Islam, (2). Pembangunan Pendidikan, (3). Pembangunan Ekonomi, (4). Pembangunan Pentadbiran dan (5). Pembangunan Sosial dan Budaya

Gagasan Membangun Bersama Islam ini mempunyai tiga teras utama iaitu ‘Ubudiyyah, Mas’uliyah dan Itqan. Pengertian ketiga-tiga ini sebagaimana berikut:

‘Ubudiyyah: Nilai ini merujuk kepada kedudukan manusia sebagai hamba Allah yang diciptakan semata-mata untuk beribadat kepadaNya. Ia memberi signifikan dari sudut sifat diri, tujuan hidup, dan juga cara menjalani kehidupan yang lahir dari pancaran iman dan aqidah yang jelas.

Mas’uliyah: Nilai ini merujuk kepada kebertanggungjawaban (akauntabiliti), iaitu segala kerja (tanggungjawab) yang dilakukan di dunia ini akan dipersoalkan oleh Allah di hari pengadilan kelak. Nilai ini merupakan konsep khilafah (vicegerence) yang memikul amanah bagi memakmurkan bumi Allah melalui amalan yang berlandaskan syariat.

Itqan: Nilai ini merujuk kepada kualiti kerja yang boleh diterjemahkan sebagai ketekunan, komitmen dan kesungguhan kerja. Nilai ini akan membentuk peribadi yang berakhlak dan bermoral serta modal insan yang cemerlang dalam melaksanakan tugas.

Bagi merealisasikan Dasar Membangun Bersama Islam, pelbagai pekeliling, enakmen dan dasar digubal sebagaimana berikut:

1. Dasar Pentadbiran Kerajaan berteraskan Syari’at
 - i) Pekeliling Pentadbiran (cuti dua hari seminggu) Jumaat & Sabtu
 - ii) Pekeliling Pentadbiran (cuti ibu bersalin) 60 hari kepada 90 hari
 - iii) Pekeliling Pentadbiran (cuti kematian pasangan) 30 hari
 - iv) Pekeliling Pentadbiran (bekerja berdekatan / mesra pasangan)
2. Dasar Perundangan dan Kehakiman
 - i) Enakmen Kanun Jenayah Syariah II (1993)
 - ii) Mengemaskini Enakmen Kekeluargaan

3. Dasar Kebudayaan dan Kesenian
 - i) Enakmen Kawalan Hiburan
 - ii) Dasar Pelancongan

4. Dasar Pembangunan Pendidikan
 - i) Dasar Pendidikan YIK
 - ii) Penubuhan KIAS dibawah YAKIN
 - iii) Dasar Bantuan pendidikan Pra-Sekolah (PASTI)

5. Dasar Pembangunan Ekonomi
 - i) Enakmen Perbadanan Menteri Besar Kelantan (PMBK)
 - ii) Enakmen Perbadanan Pembangunan Ladang Rakyat (PPLRK)
 - iii) Enakmen Perbadanan Tunjong (TDC)
 - iv) Enakmen Perbadanan Tok Bali
 - v) Enakmen Perbadanan Pertanian Kelantan
 - vi) Dasar Bertani Satu Ibadah

6. Dasar Pembangunan Sosial
 - i) Dasar Pembangunan Wanita
 - ii) Dasar Pembangunan Belia
 - iii) Dasar Keluarga Mawaddah
 - iv) Dasar Pembangunan Insan

Kerajaan Negeri juga menjadikan teras Membangun Bersama Islam iaitu ‘Ubudiyah, Mas’uliyah dan Itqan (UMI) sebagai Kod Etika Anggota Perkhidmatan Awam Negeri Kelantan bermula 2008.

Pelaksanaan gagasan Membangun Bersama Islam dapat dilihat melalui pelbagai dasar dan program yang telah dilaksanakan sehingga sekarang merangkumi: kebajikan rakyat, pelaksanaan syariat, kemajuan pendidikan, kebudayaan & pelancongan, pembangunan wanita & belia, seni hiburan, kemajuan pertanian dan keharmonian kaum.

Kebajikan Rakyat

- Bantuan Skim Az-Ziwaaj
- Skim al-It’am
- Tabung Serambi Mekah
- Ladang Rakyat
- Rumah Dhu’afat
- Sistem Ar- Rahn

Pelaksanaan Syariat

- Memindahkan akaun simpanan tetap Kerajaan Negeri daripada sistem perbankan riba kepada sistem perbankan Islam
- Menubuhkan Unit Dakwah Halaqat
- Menutup premis-premis judi
- Mengawal penjualan arak
- Memperkenalkan mata wang Dinar & Dirham
- Meluluskan Enakmen Jenayah Syariah II (1993)
- Kempen Menutup Aurat
- Menambahkan peruntukan MAIK
- Memartabatkan tulisan Jawi
- Pengisytiharan Kota Bharu Bandar Raya Islam

Kemajuan Pendidikan

- Penubuhan Kolej Islam Antarabangsa Sultan Ismail Petra, Nilam Puri
- Penubuhan Maahad Tahfiz Sains
- Menubuhkan Perbadanan Pembangunan Pondok Berhad
- Kuliah Medan Ilmu di Jalan Dato' Pati, Kota Bharu
- Kuliah agama di Masjid Al-Baro'ah Pasar Besar Siti Khadijah untuk peniaga & pengunjung
- Membuka aliran Sains Tulen di Maahad Muhammadi Lelaki / Perempuan

Kebudayaan Dan Pelancongan

- Dasar Kebudayaan berteraskan Islam
- Menubuhkan Koperasi Pendidik
- Ekspo Cheng Ho (*Kelantan-China International Trade Fair*)
- Menara Rehal sebagai simbol Kelantan Negeri Serambi Mekah
- Dasar Pelancongan Negeri berprinsipkan Pelancongan Islam

Pembangunan Wanita Dan Belia

- Dasar Keluarga Mawaddah
- Perlantikan Penghulu Wanita
- Pusat Perubatan An-Nisa' khas untuk bersalin & sakit puan
- Perlantikan Pegawai Armalah di setiap DUN
- Cakna Rakyat di setiap DUN
- Anugerah Tokoh Belia Negeri
- Liga Bola Sepak Piala Tok Guru

Seni Hiburan

- Menutup *Night Club* & lain-lain pusat hiburan
- Meluluskan Enakmen Kawalan Hiburan Negeri
- Mengharamkan persembahan Mak Yong, Menora dan Wayang Kulit
- Tidak mengeluarkan Lesen premis Pusat Video Game

Kemajuan Pertanian

- Kempen Bertani Satu Ibadah
- Projek Peristis Penternak Muda
- Skim Galakan Tanam Pokok Karas
- Penggunaan baja organik yang mesra alam

Keharmonian Kaum

- Melantik orang bukan Islam atau bukan Melayu sebagai ahli Pihak Berkuasa Tempatan (PBT)
- Menggalakkan penyertaan bukan Islam di majlis rasmi seperti sambutan Maulidul Rasul, Tilawah al-Quran dan pelbagai program
- Menggalakkan orang Islam hadir di majlis kebudayaan dan adat resam orang bukan Islam
- Menubuhkan Pusat Integrasi Antara Kaum (PEKA)
- Melantik Penghulu Tanpa Mukim Non-Muslim
- Melantik Jawatankuasa Hubungan Kaum sebagai Portfolio Kerajaan
- Melantik Pegawai-pegawai Khas Menteri Besar untuk bukan Melayu

LEGASI

Setelah 23 tahun menjadi Menteri Besar, Tok Guru mengundurkan diri pada usia 82 tahun selepas Pilihan Raya Umum ke-13. ADUN Pasir Pekan, YAB Dato' Bentara Kanan Dato' Haji Ahmad Yakob mengangkat sumpah jawatan sebagai menteri besar baru di hadapan Sultan Kelantan Sultan Muhammad V di Istana Negeri, Kubang Kerian pada 6 Mei 2013 pada usia 63 tahun.

Bermula Februari 2014 Tok Guru dilantik sebagai Murabbi Ummah berpejabat di Institut Pemikiran Tok Guru Dato' Bentara Setia (IPTG). IPTG ditubuhkan oleh YAB Dato' Bentara Kanan Menteri Besar Kelantan yang berhasrat agar pemikiran dan legasi berharga milik mantan Menteri Besar itu terus disuntikkan ke dalam jentera kerajaan negeri.

Tanggal 22 Rabiul Awal 1436H bersamaan 12 Februari 2015, Tok Guru telah dijemput Khaliqnya pada jam 9.40 malam Jumaat, di rumahnya di Pulau Melaka pada usia 84 tahun. Allahyarham telah selamat disemadikan pada jam 11 pagi di Tanah Perkuburan Islam Pulau Melaka bersebelahan pusara bapanya, Tuan Guru Haji Nik Mat Raja Banjar.

ANUGERAH & PENGHARGAAN

10 Julai 1968

Jaksa Pendamai (JP)

Kebawah Duli Yang Maha Mulia Sultan Yahya Putra Ibni Almarhum Sultan Ibrahim

1974

Kesatria Mangku Negara (KMN)

Yang Maha Mulia Seri Paduka Baginda Yang di Pertuan Agong

30 Mac 1995

Darjah Kebesaran Jiwa Mahkota Kelantan Yang Amat Mulia peringkat pertama
(Al-Isma'illi) SJMK

Kebawah Duli Yang Maha Mulia Sultan Ismail Petra Ibni Almarhum Sultan Yahya
Petra

2008

Menteri Besar paling bersih

Gerakan Rakyat Anti-Korupsi (GERAK)

November 2008

Anugerah Keamanan Nobel

Gusi Peace Prize Foundation

2009

Disenaraikan dalam buku The 500 Most Influential Muslims dan menduduki tangga ke-
42 dari keseluruhan 500 tokoh Muslim yang berpengaruh

Royal Islamic Strategic Studies Centre

13 September 2010

Darjah Kebesaran Kelas Pertama (Dato' Bentara Setia)

Kebawah Duli Yang Maha Mulia Sultan Muhammad V

28 September 2012

Tokoh Pendidikan NUSANTARA

Pengerusi Jawatankuasa Tetap Pendidikan, Pendidikan Tinggi dan Modal Insan Negeri
Selangor

24 Ogos 2013

Anugerah Integriti

Kerajaan Negeri Selangor

7 November 2013

Anugerah Khas Ikon Anak Muda Kelantan

Kerajaan Negeri Kelantan

DI SEBALIK TOK GURU

- **Pelajar Cemerlang**

Tok Guru berjaya menghafal kitab-kitab nahu dan saraf termasuk kitab Matan Alfiah, iaitu kitab nahu Arab yang sukar dipelajari dan terkenal di kalangan pelajar-pelajar pondok setanding dengan murid-murid yang lebih tua ketika berusia lapan tahun. Beliau juga fasih beberapa bahasa seperti Urdu, Tamil, Arab dan Inggeris.

- **Seorang Pemimpin dan Ahli Politik yang disegani**

“Beliau adalah seorang pemimpin yang disegani dan dihormati oleh semua kaum kerana hujah-hujah beliau dapat mengangkat politik perkauman sehingga dapat melangkaui pertelingkahan di kalangan rakyat Malaysia dengan menunjukkan nilai-nilai agama Islam adalah konsep universal yang akan membawa manfaat kepada seluruh rakyat Malaysia” – Ahli Parlimen Batu, Tian Chua

- **Pendakwah yang petah bercakap**

Beliau lebih dikenali sebagai ulamak kerana petah berpidato. Ucapan beliau terang berserta dengan perumpamaan yang jelas dan memudahkan para pendengar memahaminya. Inilah cara beliau mendapat tempat di hati penyokongnya.

- **Pakaian Tok Guru**

Tuan Guru Nik Abdul Aziz lebih gemar memakai jubah & baju Melayu serta berserban dalam urusan rasmi ataupun tidak rasmi. *Apabila ditanya kenapa berserban maka jawabnya ini meniru Nabi. Bila ditanya kenapa berbaju Melayu, maka jawabnya ini pakaian pahlawan,*” kata bekas Setiausaha Politik Menteri Besar, Annual Bakri.

- **Solat Tahajjud**

Tok Guru sentiasa bersolat tahajjud dan jarang sekali meninggalkannya.

- **Dompot**

Tok Guru tidak menggunakan dompet duit. Kebiasaannya, beliau membawa duit di dalam sampul surat di dalam poket bajunya untuk mudah menderma.

- **Solat Sulit**

Tok Guru gemar bersolat dalam keadaan gelap. *Beliau mengaku bersolat dalam keadaan gelap apabila berada di dalam pejabatnya kerana tidak mahu menggunakan duit kerajaan untuk kepentingan dirinya – Kembara Di Bumi Allah*

PESAN TOK GURU

“Saya berdoa dengan umur yang masih berbaki yang dipinjamkan oleh Allah SWT ini agar dapat meneruskan usaha memperjuangkan Islam sebagai cara hidup di negara ini. Semoga karat-karat sekular semakin menipis dan semoga Allah SWT terus memberikan keizinan kepada saya untuk menyebarkan ilmu agama, sekalipun ilmu yang saya miliki hanyalah sekadar ‘sekulit etak...’”

“Dalam perjuangan ini, idola kepada para pejuang ialah Rasulullah SAW. Sebagaimana Rasulullah SAW merupakan seorang yang memiliki sifat fatonah (cerdik), demikianlah kita sebagai seorang pejuang perlu bersifat dengan fatonah. Fatonahnya kita ialah dengan mempelajari semua sejarah Rasulullah SAW dan melaksanakan dalam kehidupan kita pada hari ini...”

“Bila saya mati, gelaran Dato’ Bentara Setia saya sudah tiada lagi, yang tinggal hanya Nik Aziz, sama ada Tun, Tin ke Tan semuanya tidak ada lagi, yang ada hanyalah pahala. Justeru, sekarang kita perlu segera jadikan amalan kerja buat kita di dunia ini menjadi pahala di sisi Allah SWT kelak...”

“Kita hidup di dunia ini bukan setakat nak hidup sahaja tapi nak hidup biar sampai akhirat. Kita bekerja biar sampai ke akhirat bahkan kita berpolitik pun biar sampai ke akhirat. Macam mana nak sampai ke akhirat, kalau semasa kita buat kerja tak pernah fikir tentang akhirat...”

“Di dalam dada kita, ada satu ruang yang perlu diisi dengan cahaya. Cahaya inilah yang akan menyuluh dan membimbing kita. Oleh itu, usahlah penuhi dada dengan perkara lain kecuali nur Ilahi . Tiada yang lebih berharga selain air mata orang yang bangun (tahajud) kerana takut azab neraka walaupun setitis, lebih berharga dari isi alam...”

“Ambil wudhuk tidak perlu banyak, tetapi biar sempurna. Ini kerana basuhan dengan air itu hanyalah simbolik. Yang hendak dibasuh bukanlah najis yang ada di wajah dan anggota kita, tetapi kotoran dosa yang dibawa melalui mata, mulut, telinga, tangan dan kaki...”

BELASUNGKAWA

Sunyi tanpa Tok Guru. “Kita rasa kesunyian dari segi ilmuan kerana Tok Guru ini walau di mana sahaja berada dia sentiasa mengeluarkan mutiara ilmu yang ada padanya sebagai ulamak”- Dato’ Bentara Kanan Ustaz Haji Ahmad bin Yakob

“Ayah berkata, jika mahu mencari ilmu sampai mana-mana pun ayah akan tanggung tetapi kalau nak suruh bawa berjalan (bersiar-siar jauh) tidak boleh.”- Nik Asma’ Salsabila (anak paling bongsu Tok Guru)

“Paling disukainya ialah duduk di masjid untuk membaca al-Quran. Selama menjadi pengiringnya, Tok Guru sering berpesan supaya solat awal waktu, jangan tinggal dan jangan lengah-lengahkan solat” . - Zakaria (bekas pengawal peribadi Tok Guru)

“ Saya amat rindukan dia,” kata isterinya Datin Bentara Setia Tuan Sabariah Tuan Ishak

“Ayah nak walaupun dia tutup mata, hudud kena buat juga di Kelantan,”- Nik Mohd Abduh Nik Abdul Aziz.

RUJUKAN

Ismail Yusof, 2013. Tesis PhD: Pemikiran dan Perjuangan Politik Tuan Guru Nik Abdul Aziz Nik Mat, UUM

Jamal Mohd Lokman Sulaiman, 1999. Biografi Tuan Guru Dato Haji Nik Abdul Aziz: Seorang Ulama' serta ahli politik Malaysia Di Abad ke 20. SULFA Human Resources & Development

Salahuddin Abdullah & Hydselan Hashim, 2010. Sejarah PAS Kelantan (1959-1978); Langkah-Langkah Menuju Mardhatillah, Badan Perhubungan PAS Negeri Kelantan

Nik Abdul Aziz Nik Mat, 2012. YAB Tuan Guru Dato Bentara Setia Nik Abdul Aziz Nik Mat - Kuliah Maghrib Madrasah Hj.Latif.
<https://www.youtube.com/watch?v=GNudJclbuy0&t=2245s>. Akses pada 10.10.2020

Nik Hamdi Abd Ghani, 2020. Temubual. 15 Oktober 2020

Nik Razi Nik Mat (Tuan Guru), 2020. Temubual. 15 Oktober 2020

Tuan Sabariah Tuan Ishak (Datin Bentara Setia), 2020. Temubual. 14 Oktober 2020

PERBINCANGAN KUMPULAN FOKUS

1. Nik Zainuddin Raja Daud
2. Wan Abdullah Azzam Wan Zulkiflee